

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), člana 1. stava (4) Zakona o izmirenju obaveza po osnovu računa stare devizne štednje ("Službeni glasnik BiH", br. 28/06, 76/06 i 72/07), a u vezi sa Zaključkom Vijeća ministara Bosne i Hercegovine s 43. sjednice, održane 17.02.2016. godine, Vijeće ministara Bosne i Hercegovine, na 112. sjednici održanoj 30.08.2017. godine, donijelo je

**ODLUKU
O POSTUPKU IZDAVANJA POTVRDE ZA
UTVRĐIVANJE PRAVA NA ISPLATU DEVIZNE
ŠTEDNJE U SKLADU SA ZAKONOM O REGULISANJU
JAVNOG DUGA REPUBLIKE SRBIJE PO OSNOVU
NEISPLAĆENE DEVIZNE ŠTEDNJE GRAĐANA
POLOŽENE KOD BANAKA ČIJE JE SJEDIŠTE NA
TERITORIJI REPUBLIKE SRBIJE I NJIHOVIM
FILIJALAMA NA TERITORIJAMA BIVŠIH
REPUBLIKA SFRJ**

Član 1.

(Predmet odluke)

Ovom se odlukom određuju organi i institucije Bosne i Hercegovine, entiteta i Brčko distrikta Bosne i Hercegovine koji će izdavati potvrdu da štediša nije ostvario pravo na povrat devizne štednje u Bosni i Hercegovini, niti mu je to pravo priznato od bilo kojeg nivoa vlasti u Bosni i Hercegovini, po osnovu devizne štednje položene u filijalama Investbanke A.D. Beograd i Jugoslavenske izvozne i kreditne banke A.D. Beograd (JIK banka) na teritoriji Bosne i Hercegovine.

Član 2.

(Nadležni organi)

- (1) Potvrdu iz člana 1. Odluke izdaje Ministarstvo finansija i trezora Bosne i Hercegovine, organi koje odredi Vlada

Federacije Bosne i Hercegovine, Vlada Republike Srpske i Vlada Brčko distrikta Bosne i Hercegovine.

- (2) Organi iz stava (1) ovog člana dužni su u roku od 15 dana od dana stupanja na snagu ove odluke odrediti organe nadležne za izdavanje potvrde.

Član 3.

(Zahtjev i Potvrda)

- (1) Zahtjev za izdavanje potvrde za deviznu štednju koja je položena van teritorije Bosne i Hercegovine podnosi se Ministarstvu finansija i trezora Bosne i Hercegovine.
- (2) Ako je devizna štednja bila na teritoriji Bosne i Hercegovine, zahtjev za izdavanje potvrde podnosi se entitetu na čijoj se teritoriji nalazila devizna štednja, odnosno Brčko distriktu Bosne i Hercegovine.
- (3) Zahtjev za izdavanje potvrde podnosi se lično ili poštom.
- (4) Potvrdu izdaje nadležni organ ili institucija iz st. (1) i (2) ovog člana u roku od osam dana od dana prijema urednog zahtjeva.

Član 4.

(Obrasci)

Zahtjev i potvrda podnose se, odnosno izdaju se na obrascima koji su sastavni dio ove odluke.

Član 5.

(Stupanje na snagu)

Ova odluka stupa na snagu danom donošenja i objavljuje se u "Službenom glasniku BiH".

VM broj 208/17
30. augusta 2017. godine
Sarajevo

Predsjedavajući
Vijeća ministara BiH
Dr. Denis Zvizdić, s. r.